



Amaloota Gabroota Ar-Rahmaan-Kutaa 3

Description

Kutaa darbee keessatti amaloota Gabroota Ar-Rahmaan sadii ilaalle turre. Isaanis: (1)-yommuu dachii keessa deeman tasgabbii fi haala madaallamaan deemu. (2)-Yommuu wallaalonni fi gowwoonni dubbii badaan isaan dubbisian, dubbii gaarii isaanitti deebisuun nagaha ta'u. (3)-Halkan irraa hanga danda'an salaataa bulu. Halkan isaanii tapha, badii fi wanta faaydi hin qabne irratti kan dabarsan osoo hin ta'in Gooftaa isaanii gabbaraa bulu. Badii fi hanqinna isaanitiif obboroo araarama kadhachuu baay'isu. Kuni hundi jirenya isaanii keessatti tasgabbii fi gammachuu dhangalaasa. Mee har'as itti fufuun amaloota isaanii haa ilaallu:

﴿وَالَّذِينَ يَقُولُونَ رَبَّنَا أَصْرِفْ عَنَّا عَذَابَ جَهَنَّمَ إِنَّ
 كَانَ غَرَامًا ۚ إِنَّهَا سَاءَتْ مُسْتَقْرًا وَمَقَامًا ۚ﴾ ٦٥

“Ammas isaan, “Gooftaa keenya! Adabbi Jahannam nurraa deebisi. Dhugumatti adabbiin ishii namatti maxxanaa ta'eera. Dhugumatti ishiin iddo qubannaa fi iddo turtii ta'uun fokkattet!” kanneen jedhaniidha.” Suuratu Al-Furqaan 25:65-66

Amaloota gabroota Ar-Rahmaan keessaa halkanii guyyaa Rabbiin subhaanahu wa ta'aalaa adabbii Jahannam isaan irraa akka deebisuu kadhatu.

“Gooftaa keenya! Adabbi Jahannam nurraa deebisi.” Kana jechuun Yaa Gooftaa keenya! Adabbi Jahannam nurraa garagalchi, nurraa fageessi. Kuni kan agarsiisu dogongora hojjatan amanuun Gooftaan isaanii adabbii Aakhirah akka isaan irraa deebisu kadhatu. Akkasumas, Gooftaan isaanii ma'asiyatti (badiitti) kufuu irraa akka isaan eegu kadhatu. Yoo badii fi cubbuu Jahannamitti nama geessu irraa isaan eege, adabbii Jahannam isaan irraa ni deebisaa jechuudha.

Jahannam- maqaa dhuunfaa ganda adabbii Rabbiin kaafirotaa fi warroota badii hojjataniif qopheessedha. [1] Jecha biraatin maqaa ibiddaati. Jahannam kan jedhameef garmalee gadi fagoo fi dukkana waan ta'eefi.[2]

“Gharaamaa”-jechuun adabbii cimaa yeroo hundaa namatti maxxanuu fi namarraa addaan hin baanedha. Kaafirota irratti adabbiin Jahannam yeroo hundaa cimaa fi maxxanaadha. Isaan irraa addaan hin bahu, gadi isaan hin lakkisu.

“Mustaqarr”- iddo qubanna yeroo hunda achi turaniidha. Jahannam iddo qubanna yeroo hundaa kaafironni achi keessa turaniidha. Achi keessaa bahuun isaaniif hin jiru. Zalaalamii achii keessa jiraatu.

Muqaama– makaanu iqaamati- iddo turtii, iddo jirenyaa. Iddoo jirenya yeroo hundaaf turuun dirqamaa miti. Namni iddo tokko yeroo gabaabaaf turee ergasii deemu danda'a. Akkuma biyya keenya keessaa baanee biyya biraajiraachuuuf deemnu iqaamaa fudhanne yeroo murtaa'af turra. Ergasii, gara biyyaatti deebina ykn mala biraajiraabbaadanna.

Garaagarummaan mustaqarr fi muqaama jidduu jiru, mustaqarr iddo qubanna yeroo hunda keessa turaniidha. Muqaama immoo iddo turtii ykn iddo jirenyaa yeroo hunda achi turun dirqama hin taanedha.

Ibsa kana booda, Jahannam keessatti “Mustaqarr” kaafirotaa fi munaafiqotaaf ta'a. Kaafironni fi munaafiqonni Jahannam keessa zalaalami waan jiraataniif, Jahannam isaaniif iddo qubanna yeroo hundaa keessa turan taati. Muqaama immoo warra amananii badii baay'ee hojjachuun nafsee ofii irratti daangaa darbaniif ta'a. Warrooni kunniin yeroo murtaa'ef Jahannam keessa erga turanii booda waan bahanii, Jahannam iddo turtii isaaniif taati. Akkuma beekkamu, warri amananii fi Rabbiin tokkichoomsanii garuu badii isaanii baay'atee Jahannam yoo seenan, yeroo hunda achi keessa hin turan. Hanga badii isaanii Jahannam keessatti erga adabamanii booda, achi keessaa bahanii Jannata ni seenu.

Jahannam iddo qubanna yeroo hunda keessa turan ta'uun, ammas iddo yeroo gabaabaf keessa turaniis ta'uun kan fokkateedha. Sababni isaas, adabbiin Jahannam cimaadha.

Amaloota gabroota Ar-Rahmaan keessaa, yeroo hundaa hanqinnii fi dogongorri isaanii isaanitti dhagahama. Kanaaf, Rabbiin rahmata Isaatiin isaaniif araaramu, isaaniif irra darbuu fi adabbiin Jahannam isaan irraa akka deebisu ni kadhatu.

Jecha gabroota Ar-Rahmaan, sa'aat mustaqarran wa muqaama jedhu keessatti, iddo sodaa isaanii agarsiisa. Gara fuunduraatti haalli isaanii jijiramee shirkii fi wanta badaa sanii olii hojjachuun Jahannam isaaniif iddo qubanna ni taati sodaatu. Ammas, shirkii gaditti badii gurguddaa hojjachuun Jahannam iddo yeroo gabaabaf keessa turan ni taati sodaatu. Kanaafu, Gabrooni Ar-Rahmaan adabbi warra yeroo hundaa achi keessa turan ta'i, adabbi warra yeroo gabaabaf achi keessa turan ta'i, adabbi Jahannam gosa hundaayyu akka isaan irraa deebisu fi garagalchuu Rabbii isaanii kadhatu.

Du'aayin armaan olii kuni addunyaa tana keessatti sababoota Jahannamitti isaan geessu akka Rabbiin isaan irraa deebisu of keessatti qabata. Kanneen akka kufrii, shirkii fi badii adda addaa isaan irraa akka deebisu kadhatu. Kunis kan ta'u, iimaana sirrii fi hojji gaggaariin isaan waffaquu (qunnamsiisudha).

Jecha biraatin, iimaana sirrii akka qabaatanii fi hojii gaggaarii akka hojjatan isaan dandeesisuudha. Iimaana sirrii qabaachuun nafsee ofii kufrii irraa eegu. Kanaafu, Rabbiin Jahannam keessa yeroo hundaa turuu isaan irraa deebisa. Hojii gaggaariin immoo nafsee ofii badii fi cubbuu irraa eegu. Kanaafu, Rabbiin osoo yeroo gabaaballee ta'ee Jahannam keessa turuu isaan irraa deebisa.

Ammallee, du'aayin isaanii kuni tawbaaf, araarama kadhachuu fi gara Isaatti deebi'uuf akka isaan waffaqua Rabbiin kadhachuu of keessatti qabata. Akkuma ma'asiyaan isaan irraa mul'atuun, yookiin dogongorri isaan irratti argameen, hanga Rabbiin badii isaanii isaan irraa haaqee fi tola Isaatiin isaaniif irraa darbee ergasii Gooftaa isaanii galmee wanta ibidda Jahannam keessatti akka adabamaniif isaan taasisu keessa hin jirreen itti dhufanitti, tawbaa fi istighfaara akka isaan qunnamssiisu kadhatu.[\[3\]](#) Gabaabumatti, gabroonni Ar-Rahmaan, "sababoota adabbi Jahannamitti nama geessan irraa nu eegun, dogongoraa fi badii keenya nuuf araaramuun adabbii Jahannam nurraa deebisi" jechuun Rabbii isaanii kadhatu.[\[4\]](#)

Mee du'aayi bareeddu armaan olii tana namni hunduu akka itti fayyadamuuf jecha jechaan haa ilaallu. Seensa irratti "Wallaziina yaquuluuna" jedhu, hiika "isaan kanneen jedhaniidha" jedhu waan qabuuf du'aayi keessa hin seenu. Du'aayin kana:

رَبَّنَا أَصْرِفْ عَنَّا عَذَابَ جَهَنَّمَ إِنَّ عَذَابَهَا كَانَ
غَرَامًا ٦٦ إِنَّهَا سَاءَتْ مُسْتَقَرًّا وَمَقَامًا

"Rabbanasrif annaa azaaba jahannama inna azaabaha kaana gharaamaa. Innahaa saa'at mustaqarran wamuqaamaa."

Hiika jechoota: **Rabbanaa-Gooftaa keenya, isrif-deebisi, annaa-nurraa, azaaba-adabbii, jahannama-Jahannam, inna-dhugumatti, azaabaha-adabbiin ishii, kaana-ta'eera, gharaamaa-namatti maxxanaa, innahaa-dhugumatti ishiin, saa'at-fokkatte, mustaqarran-iddoo qubannaa yeroo hundaa keessa turan, muqaamaa- iddo turtii**

Hiika himaa: "Gooftaa keenya! Adabbi Jahannam nurraa deebisi. Dhugumatti adabbiin ishii namatti maxxanaa ta'eera. Dhugumatti ishiin iddo qubannaa fi iddo turtii ta'uun fokkatte!"

Guduunfaa

¶Gabroonni Ar-Rahmaan osoo hanga fedhan hojii gaggaarii hojjataniyyuu, yeroo hundaa dogongorri fi hanqinni isaanii isaanitti dhagahama. Kanaafi, Rabbiin adabbi Jahannam isaan irraa akka deebisu halkanii guyyaa kadhatu. "Hojiin kiyya Jahannam jalaa na baasa" jechuun of hin jajan.

¶Adabbi Jahannam akka isaan irraa deebisu Mawlaa isaanii kadhachuu wantoota armaan gadii of keessatti qabata:

?Guyyaa Qiyaamaa zalaalamiifis ta'ii yeroo gabaabaf Jahannam keessa akka hin turreef adabbi

Jahannam akka isaan irraa deebisu kadhatu. Jecha biraatin, zalaalamiif ta'ii yeroo gabaabaaf Jahannam keessa akka isaan hin seensifne kadhatu.

?Badii fi cubbuu Jahannamitti nama geessu irraa akka isaan eegu kadhatu. Kunis kan ta'u, iimaana sirrii akka qabaatanii fi hojii gaggaarii akka hojjatan issaan dandeesisuun. Iimaana sirrii qabaachun kufrii irraa of eegu, hojii gaggaarii hojjachuun badii fi cubbuu irraa of eegu.

?Badii fi dongongora hojjataniif akka isaaniif araaramu kadhatu. Badii fi dogongora adabbii Jahannamitti nama geessu yoo isaaniif hin araaramin, Jahannamiin akka seenan ni beeku. Kanaafi, yeroo hundaa Rabbii olta'aa irraa araarama kadhachuu (istighfaara) baay'isu.

Kitaabban wabii

- [1] [Ma'aariju Tafakkuri wa daqaa'iqu tadabburi-jiildi 6, fuula 622](#)
- [2] [Tafsiiru Qur'aanil Kariim, Suuratu Furqaan, fuula 276, Muhammad bin Saalih Useymiin](#)
- [3] [Ma'aariju Tafakkuri wa daqaa'iqu tadabburi-jiildi 6, fuula-622-625](#)
- [4] [Tafsiiru Sa'dii-fuula 686](#)

Date Created

November 5, 2019

Author

admin